

摘藻堂四庫全書薈要

集部

欽定四庫全書薈要

集部

御定歷代賦彙卷三十三

四

欽定四庫全書薈要卷一萬七千二百五十二

集部

御定歷代賦彙卷三十三

都邑

兩都賦

有序

唐李庚

見漢諸儒若班固張衡者皆賦都邑盛稱漢隆當

王道昇平火德丕赫數子歌詠發著後代今自隋室遷都而我宅焉廣狹榮陋與漢殊狀言時則有六姓千齡之變言地則非秦基周室之故宜乎稱漢於彼述我於

此臣幸生聖時天下休樂雖未及固衡之位敢效皋陶
奚斯庶幾之誠謹冒死再拜獻兩都賦凡若干言以詘
夸漢者昭聞我十四聖之制度請付史氏賦曰

洛汭先生客於上京問里人以秦漢咸陽故事里人曰
先生不習乎哉秦址薪矣漢址蕪矣西去一舍鞠為墟
矣代遠時移作新都矣先生曰賓者不識藐然老沉憯
歲亡而日遠願聞古而知今為我源說恭承玉音里人
曰昔者帝兆唐居命隋先基乃假隋權是開中原既權

二年為唐遷都周榛秦莽平無析餘文驅煬逆卒於侑
傳若天使項氏死勞而授漢休也唐開禪壇新都之門
闢殿乾宮以朝諸侯時則有若房魏作弼英鄂執律南
陽故人河間帝室戎衣既脫瑞氣洋溢歡聲傳於億兆
煬燎致乎太一乃會漢酺發周賚謚萬類淳四海遂開
國以報功差子男之五等然後構閣圖形榮號凌煙指
河帶以山礪書天子之縉紳其制度也擁乾休正坤儀
平兩曜據北辰咸陽而會龍首右社稷而左宗廟宣

達周衢址以十二棊張府寺局以百吏環以文昌二十

四署六部提統按星分度儼憲臺而西列肅陰館於北

戶建倍員於前王總維綱於御史端國

原本闕八字

朝儀實周

察乎左右其內則有太極承端通址含元日出東榮月

沉西軒倚九變之下麓涵太液之清瀾龍道雙迴鳳門

五開煙籠凝碧風靜蓬萊東則左閣當辰延英眈眈宣

徽洞達溫室隅南接以重離縣乎少陽是為二宮復道

邃廊西則月華重啓銀臺內向中書在焉密用宰相宦

者別省延緣右藏建子亭於屏外設蘭綺於廡下天子
端朝明庭九賓發少府之冕旒陳奉常之書勲肅勾陳
以辟護翼雉扇而對分雞人乃下鶴唱先聞千官就日
萬品趨雲漏遲遲而東轉風習習而南薰外則國子招
徒疏館開軒左立太學前惇廣文膳豐中厨就教九年
稽以博士總之成均祕書典籍品命校郎橫閣三重闡
正鉛黃若六藝之條貫百氏之縱橫交錯發論禮形而
樂聲太傅在前少傅在後載言載筆出納謨誥鵷動鸞

飛振玉鏘金殷廟羞瑚璉之器楚材慙杞梓之林已而
變和陰陽經緯天地採撫軒昊牢籠虞夏闢孔子之學
堂敷一代之風雅此王者之文教也親兵百萬制以神
策紫身豹首金腰火額獵霞張旆剥犀綴革奮目而虎
背振髯而蝟磔柔六鈞貫七札對天仗以司戈分玉墀
而執戟別有陳旌賜鉞閫外四七依榆闕以作鎮拒柳
營而開壁逐虜則出塞飛塵伐叛則救暘作澤此王者
之武威也唐禮既行三代同風徵叔孫之春官命伯夷

之秩宗則有封禪巡狩謁天拜祖明堂辟雍王者之事
有司勿失次有朝廷之位班爵之序器服車馬以節文
武不僭不濫羣臣之事有司以告下有內族外姻以殺
以隆五禮各殊陳吉儀凶一室是形天下大同百姓之
事有司以教故以內則敬以外則嚴以家則肥以國則
昌卿士翼翼公侯皇皇在野熙熙在朝蹒蹒夫如是夸
周而正魯胡可殫詳洎乎樂之設也以德配樂陳器以
作草木匏竹篳簹磬罇命官二署諧以協律以奏廟貌

祖考來格以陳宮庭簫韶九成鳳凰來儀以布天下手
之舞之足之蹈之及乎御肩衣集舞童或獻凱作名以
宣帝功或布字綴行以達皇風此禮經之所未紀夔夏
之所不同刑期無刑辟以止辟三章置漢祖之德肆赦
緩穆王之法於是天子御端門詔天下渙汗發澤與民
更始建金雞於仗內聳修竿而揭起其下則稅三關解
銀鐺追共工徙驩兜照舜絃浹堯年臺收白簡史閣丹
筆總秩官之計料不踰乎三十斤匡衡之失論罪溫舒

之不足司刑無鬼哭之庭大理有鳥巢之獄又若薦祖
建宮玄元之庭霞帔雲冠飄飄太清天子將有事也歲
豆時遵夏簋殷鉶傳金爐之御煙開甲帳之琳琅此王
者之示孝也對里連街帝宅王家青門列檻棠棣分華
勤政外名花萼中題屹雲中而佩鳳香天外而舒蛻於
是天子設千席羞百醴家人齒筵愉愉濟濟此王者之
示悌也盛則長隄砥平錯則纓弁繁夥佩印分魚九參
六佐肅威儀於行蓋指戒途於前馬待漏未開朝騎杳

街雞鳴朱邸火度青槐先導擘雲後車奮雷遞以嚴聲
不生微埃人寒物慄統以京尹臨人秉殺罔敢不謹豪
家戚里金張許史走騎如龍行車若水拉枯請命曾不
仰視配前秦與後趙固異代而殊擬其地勢也負秦章
臺倚漢甘泉帶涇渭之富流挾終南之壽山指重城於
二華拓外門於兩闕玄素交川灞澹在焉斷虹偃蹇而
亘梁拖輪走驟而蹄奔度萬國以向朝趨魏闕之通門
赤縣統劇停阡帝鄉長安萬年乾封明堂藍田左倚鄠

杜前張分圻連乎馮翊畫疆接乎岐陽排吳山而抵蜀
亘氏谷而通商天子穆清環衛陳兵將軍之號三番六
營至乃辨曉警昏主在金吾鼓列六條外傳通衢備以
嚴兵羅以周廬禁動息人用戒不虞其中則御水分溝
昆明下流在野決溉入宮環洲菰織蒲紉芡贄菱羞渚
戲玄鷁沙眠白鷗其遠也深有蛟潭派作龍湫涖接河
漢波通女牛其近也方塘含春曲沼澄秋戶閉煙浦家
藏畫舟爾乃農家東作厥土黃壤樹以桑柘翳蒼乎南

畝以杭以稌以稷以黍以輸太倉天子之儲土厚地中

溫寒以宜門多杖老室有蕃兒承化發謠帝力不知則
有程鄭之家白闥朱軒崇基峻砌待駟高門木秀茸葩
紅舒綠繁挺碩果於華林育豐蔬於中園珠箔畫晦金
缸夜明羅繡巾幘鼓瑟吹笙譁族陳賓以樂乎太平貨
隧分塵物次駢連中署肆師夕咽朝昏越璞楚琛蜀賄
巴寶裁綺張繡紋軸蕉筒聲教之所被車書之所通交
錯雜沓斯焉會同黃宅緇廬金篆玉局以張帝居用壯

天庭千形萬聲不可多名天子奉堯舜之道勤后稷之功當仲夏而獻繭立中和而視農然後黼黻時備采盛告豐其接下情也則堯鼓不懸晉木不列鎔金作軌四門是揭人靡迷邦士無諱訐示收才而問昔上諫行而冤達當其萬國貢珍四夷納賁賦用每通財因輦進地官計國度支主各百姓既足斯焉充牣復若天府萬品以備供職登饌則光祿獻廚命駕則太僕承軾其樂人也大啓九門分開三殿齒羣臣於次坐徵公族於內宴

於以訓恭儉於以示慈惠戲族咸在百弄迭改視仙童

之霓裳觀壯夫之角觝御階晝陰帝座春深繽紛宮闈

窈窕嬪林既受賜於逮昏盡拜帛而懷金與衆之樂一

日於此先生獨不習乎其四郊也或有乘時之舊址亡

國之遺蹤天子迎四氣盡然改容曰是足以懷傷於耳

目作戒於心胷昔秦政肆刑秦民共傾楚澤大呼分隳

列城徒罷驪山役休上林秦址既遷鴻門至今此東郊

之事也隋苑廣袤置籠南山占地萬頃不為人間齊門

失耕禽遊獸間代謝物移繚垣不完此南郊之事也豐
水悠悠文王作周傳艱子孫衰平遂遷乃睠鎬都武王
宅居國夫報邈艷鎬皆蕪此西郊之事也漢設五時以
主淫祀樂誑徐誣將求永久天子親拜太牢泰牡事亡
地存為天下笑此北郊之事也故因迎春則鑒秦敗知
恃刑不如恃德也因迎夏則鑒隋怠知獵獸不如獵賢
也因迎秋則鑒周勤知祖基作艱傳萬年也因迎冬則
鑒漢誤知去淫即正獲天祚也四鑒以陳澤於生人四

德以懋格於上下故我高祖一呼大定安都居正傳今
皇帝一十四聖是知禪國也禪都也非得隋之命是得
天之命

右賦西都

先生曰富哉言乎堯舜之事吾知之矣然天地旁魄與
區不一九衢六陌亦稱河洛始乎周卜今自隋革進八
百里作唐東宅成者居者余得其故用悉聞見丕我王
度子不識乎顛煬僨華中原毒痛順天應人文皇赫圖

王充不來建德相依阻我東人不蘇義旗高祖西安文
皇舞干一挂戎衣邦人保完彭城獻級東功乃立則創
業之事不獨於西也至天后朝匪伊是居於焉逍遙明
帝大同出震開宮恩波爾鄉洩源於東則太平之事不
獨於鎬也若乃用洛為池帶河為沼洞八門之會要控
二梁之天矯在隋之始劃前規之隘侈舊制之陋指半
舍而薪布乃集工而成就重城不居萬盜齊構訖大業
於義寧廓皇家而遜授既而天踵以正地產以實禎符

所記嘉名不一表賢則河水變清瑞聖則洛圖屢出帝
功既成封禪禮行顯祖光宗勒岱而祈嵩我甸我郊三
聖之靈壇在焉赤縣神州與京比儔徑山東之貢賦扼
關外之諸侯直齊梁而駕輅引淮汴而通舟太行枕甸
發址崇垓覃懷鎮封上千昭回鑿門導伊兩阜屏開育
仁頤智堂與庭隈爾其左掖通東右掖洞西籠故地之
銅駝抱舊里之玉雞御溝接派苑樹通堤抗鳳樓於內
庭矗端門於天街上陽別宮丹粉多狀鴛瓦鱗翠虹梁

疊壯橫延百堵高量十丈出地標圖臨流寫障霄倚霞
連屹屹言言翼太和而聳觀側賓曜而疏軒若蓬萊之
真侶瀛洲之列仙鸞駕鶴車往來於中天嚴城曉啓千
門萬戶建衛對營開局接牖翠華在鎬分官以守監署
惟三卿曹亦九臺閣高閎支馭東方仍俾二官別持憲
綱赫若夏日凜如秋霜威動乎甌閩之國風行乎燕薊
之鄉郊圻作固兵屯孟津千里無煙萬夫狴狴實兼武
牢以食濟溫惟是咽喉屬於將軍禮樂所流厥惟舊周

追魯俗而為鄰化殷頑而作桀異材挺擢多士優游原
臚臚而耕溺水濺濺而洗由士得天爵孝稱行原身行
大節里有旌門以繼前修以垂後昆榮一時之史籍聳
當代之人倫兄友弟恭位皆崇榮石記標衢棣萼為名
螭頭龜趺疑峙雙形指兩馮而遠邁封二陸而遐征至
若里巷之新名閭閻之近革或區區於傳說或瑣瑣於
典冊非儆戒於將來何侈言之敢作且二誥尚存始卜
惟艱四姓所都季年乃遷或得於聞或得於傳幸子勿

詳試為子發乎齒牙里人曰諾先生曰邾郚之地中居
帝域賢相聖營龜符墨食成王定鼎以休姬德三十承
孫八百祚年祖功寢微衰平乃遷幽用婦烽諸侯疾怨
夷元敬朔太史不頒百派分波爭涸其源汜水而鄭陽
翟而韓晉盟河陽秦戍新安一旅之兵一同之土嬴氏
乘之不享文武此周之失都也南陽真人復運漢基舊
邦惟新上稱康時光武而釀明醴和醅沖質不長桓靈
自縱后戚立權內官分弄四星耀斗百桶摧棟陽弱陰

強劉輕曹重此後漢之失都也魏丕徙許促齡四十彊
臣執柄三嗣徒立政由甯氏王髦莫奮瓦斛土崩炎居
負遜此魏之失都也晉始三世亂興永嘉蕭牆構兵沉
關稱戈浩浩逆流天下墊波八王既分五馬南奔左袵
之裘乃來中原此西晉之失都也故權在諸侯而姬氏
平權在內官則漢室傾權在強臣則魏徂權在親戚則
晉走是四者各以其故權與勢移運隨鼎去從古如斯
謂之何如世治則都世亂則墟時清則優偃政弊則戚

居勿謂往代試言前載開元太平海波不驚乃駕神都
東人誇榮時則麟麟其車殷殷其徒行者不齎衣食委
衢冠冕之夫綺羅之婦百室連歌千筵接舞高樓大觀
陳賓宴侶金堂玉戶絲哇管語我道如堯我稅如貉貧
庾而道賤筭而楊比屋相視恥衣空帛開場分肆不列
筵麥同軌同文晝呼夜譟父懌子愉去經而盤既兆既
億動動植植無聲之樂薰然不息稽成康之周隆考文
景之漢休推代繫時不為彼擾我俗既饒我人既驕安

不思危逸而忘勞故天寶之季漁陽兵起逆旗南指我
無堅壘匝旬輦動衝天羯腥門開麗景殿據武成殺人
如刈焚廬若薙蜀駕先移肩師後誓傷四年之委燼奮
二將以建勲天落妖彗風摧陣雲及夫埽臺榭之灰收
京野之骨徵郡國之版在驗地官之籍列太平之人已
十無七八至德復興六紀於茲七聖儲休平癰補瘼故
含識之士女植髮之童兒皆能痛其喪亂而期我康時
今四方之事叟不知也惟洛泱泱濱盈萬室惟城職職

市鄧駢集比年大有稍藏以實都人嬉賀有笑無慄咸
曰將覩乎貞觀之風開元之日鄉里之人思萬乘之威
儀幸物阜而時和指康衢而引領作望幸之賡歌歌曰
曉雲行兮西風慶搖裔兮龍在中望雲光兮拜千百西
澤霈兮均東澤里人曰誠哉是言前年日南至天子謁
太清太廟郊天祀地既畢事執謙端珽謂公卿大夫曰
予在人上歷祀三世年穀比登未極於富人庶稍蕃未
臻於壽動植小遂猶有枯夭日月所至猶照叛土戎狄

雖貢西地猶虜今行大禮得不媿望於天而獻羞於祖
是尚以聖政為憂未意於行幸也先生曰大哉為君用
是言也理是事也則千里如郊萬里如圻在西而東均
處內而外肥吾歸息鄉里之謠安堯舜之時將齊驅於
壽域何近喜而遠悲則知鑒四姓之覆轍嗣重葉之休
烈用是言也理是事也即所都者在東在西可也

右賦東都

汴都賦 有序

宋 周邦彥

臣邦彥頌首再拜曰自古受命之君多都於鎬京或在洛邑惟梁都於宣武號為東都所謂汴州也後周因之乃名為京周之叔世統微政缺天命蕩杞歸我有宋民之戴宋厥惟固哉奉迎鑾輿至汴而止是為東京六聖傳繼保世滋大無內無外涵養如一含牙戴角莫不得所而此汴都高顯宏麗百美所具億萬千世承學之臣弗能究宣無以為稱伊彼三國割據方隅區區之霸言餘事乏而三都之賦磊落可駭人到於今稱之矧皇居

天府而有遺美可不愧哉謹拜手稽首獻賦曰

發微子客遊四方無所適從既倦遊迺崎嶇遭迴造於
中都觀土木之妙冠蓋之富煒燁煥爛心駭神悸睽睨
而不敢進於是夷猶於通衢彷徨不知所居適遭行流
先生目而招之執其袪局局然歎曰觀子之貌神采不
定狀若失守豈非蔽席隱茅未遊乎廣廈誅草鉏棘未
擷乎蘭茝被褐懷緼未曳乎綺縠微邦陋邑未覩乎雄
藩大都者乎發微子恬然有赧色曰臣翱翔乎天下東

欲究扶桑西欲窮虞淵南欲盡反戶北欲徹幽都所謂
天子之都則未嘗歷焉今先生訊我誠有是也然觀先
生類辯士其言似能碎崑崙而結溟渤鏤混沌而形罔
象試移此辯原此汴都可乎臣固不敏謹願承教先生
笑曰客知我哉於是申喙據牀虛徐而言曰噫子獨不
聞之歟今天下混一四海為家令走絕徼地掩鬼區惟
是日月所會陰陽之中據要總殊揭鍵制樞拱衛環周
共安乘輿而此汴都禹畫為豫周封鄭地皆觴臨而上

直實沈分以為次推蓬澤之固境昔合縻之所至芒碭
渙渦截其面金隄玉渠累其脊雷夏灘沮繞其脅壘丘
訾婁夾其腋梁周帝據而縻沸漢唐尹統而寧一故此
王國襲故不徙恢圻甸域尊崇天體司徒制其畿疆職
方辨其土地前千官而會朝後百族而為市分疆十同
提封萬井舟車之所輻輳方物之所灌輸宏基融而壯
址植九鼎立而四獄位仰營域而體極立土圭而測晷
蜀險漢全荆惑閩鄙惟此中峙不首不尾限而不迫華

而不侈環睇賊於郡縣如岫嶺之迤邐觀其高城萬雉
埤堦鱗接繚如長雲之方舒屹若崇山之礪礎坤靈因
顛負而跼蹐土怪畏榨壓而妥貼靡胥不可絕而登爵
鼠不可噉而穴利過百二險踰四塞鄙秦人之踐華陋
荊州之却月傾捷步與超足引蹕蹕與蹙蹙闕城為門
二十有九瓊扉塗丹金墉鏤獸列兵連卒呵夜警晝異
物不入詭邪必究城中則有東西之阡南北之陌其衢
四達其塗九軌車不理輶互人不爭險易劇驂崇期蕩

夷如砥雨畢而除糞夷弗穢行者不馳而安步遺者惡
拾而恣棄跨虹梁以除病涉列佳木以安況瘁殊異羊
腸之詰曲或踈蹠而折轆顧中國之闐闐叢貨幣而為
市議輕重以莫賈正行列而平肆竭五都之環富備九
州之貨賄何朝滿而夕除蓋趨贏而去匱萃駟僧於五
均擾販夫於百隧次先後而置叙遷有無而化滯抑強
賈之乘時摧素封之專利售無詭物陳無窳器欲商賈
之阜通迺有廛而不稅消卓鄭猗陶之殖貨禁乘堅策

肥之擬貴道無游食以無為矧敢婆娑而為戲其中則
有安邑之棗江陵之橘陳夏之漆齊魯之麻薑桂藁穀
絲帛布縷鮐黃鮑鰓釀鹽醢或居肆以鼓鑪索或鼓
刀以屠狗彘又有醫無閭之珣玕會稽之竹箭華山之
金石梁山之犀象霍山之珠玉幽都之筋角赤山之文
皮與夫沉沙棲陸異域所至殊形妙狀目不給視無所
不有不可殫紀若夫帝居安麗人所未聞南有宣德北
有拱辰延亘五里百司雲屯兩觀門峙而竦立累愚遐

望而相吞天河羣神之闕紫微太一之宮擬法象於穹

昊敞閭闔而居至尊樸桷不斲素題不斲上圓下方制

為明堂告朔朝歷頒宣憲章謂之太廟則其中可以敘

昭穆謂之靈臺則其高可以觀氛祥後宮則無非貞無

錄之女佞倖滑稽之臣陋甘泉於楚宮繆延壽與阿房

信無益於治道徒竭民而怠荒故今上林仙藥不聞乎

鳴蹕瓊甌歲久而苔蒼其西則有寶閣靈沼巍峩泛濫

繚以重垣防以迴堤雲屋連移瓊欄壓墀池水則溶溶

汙汙洋洋湜湜涵潤漉漉瀟瀟浩漚微風過之則澗泥
淺濟漫散洄淀漑漑連漪大風過之則汨湧潏漑滃淖
溇沔掀鼓漢溢不見津灋舞欄景以斷續漾金碧而陸
離恍渢渢與方壺帝令鬼鑿而神移其中則有菰弱荻
蘆莕蓴蓮葭蘋薊薊如其魚則有鱣鯉魮鮓鰱鯪鯢
魶鰾鰒鰌鰈歸王鮪科斗魁陸龜鼉鼈蜃含蜃巨蜃容
與相羊蔭藻依蒲其鳥則有鴛鴦鵝鶩楚雀鸛鷀揮霍
鸞鷟鸞鷟羣羣羣羣

啄其木則有栳櫨枿枿樅櫨檉檉柘桑楊
梓杞豫章句科扶疏蔽芾竦尋集弱倚施
挈枝刺條修幹蟠根矯躡鱗傲其下則有申
葉蘭茝芸芝荃蓀髮布絲勻馥郁清芬其
氣襲人上方欲與百姓同樂大開苑圃凡黃
屋之所息鑾輅之所駐皆得窮觀而極賞命
有司無得彈劾也於時則有絕世之巧凝神
之技悅人耳目使人忘疲是故宮旋室浮艫
艦移也蛟螭蜿蜒千撓渡也虢虎瞿瞿角觝
戲也星流電掣弄丸而揮劒也鸞

悲鳳鳴纖麗歌也鴻驚燕居綽約舞也霆震雷動鈞天
作也犇羈駉駉羣馬闖也轡輶輶萬車轍也灑天翳
日揚埽塏也杭山蕩海歡聲同而和氣浹也震委蛇而
唬罔象出鮫人而舞馮夷者潛靈幽怪助喜樂也若乃
豐廩貫層既多且富永豐萬盈廣儲折中順成富國星
列而棊布其中則有元山之禾清流之稻中原之菽利
高之黍利下之稌有釐有芑有秬有秠千箱所運億廩
所露入既夥而委積食不給而紅腐如坻如京如岡如

阜野無菜色溝無捐瘠牆拾狼戾足以厭鰥夫與寡婦
備凶旱之乏絕則有九年之預又將敦本而勸稼開帝
藉之千畝良農世業異物不覩播百穀而克敏應三時
而就緒蹠鎛鎡閔灌溉雨霑孰任其力侯疆侯以千耦
其耘不怒自力疏邀其理稂莠不植奄觀堅阜與與疑
疑溝塍畹畦亘萬里而連繹醜惡不毛磽陁荒瘠化為
好時轉名不易惟彼汴水貫城為渠並洛而趨昔在隋
葉禊丁大業欲為流連之樂行幸之遊故鑿池導水南

抵乎揚州生民力盡於畚鍤膏血與水而爭流鳳舸徒
見於載籍玉骨已朽於高丘顧資治世以為利迄今杭
棧而浮舟桃花候漲竹箭比駛洶湧湓潏瀉沸澶掬
防巖岸渚濶迅邁匪江匪海而朝夕舞乎滂湃掀萬石
之巨艚比坳堂之一芥舵艣不時而相值篙師鼃拱而
俟敗智者不敢睥睨而興作繇干禩而為害豈積患切
病待聖人而後除邪厥有建議導河通洛引宜禾之清
源塞孽華之渾濁蹙廣堤而節暴紆直行而殺虐其流

舒舒經炎涼而靡涸於是自淮而南邦國之所仰百姓之所輸金穀財帛歲時常調舳艫相銜千里不絕越舡吳艚官艘賈舶閩謳楚語風帆雨楫聯翩方載鉦鼓鎗鎗人安以舒國賦應節若夫連營百將帶甲萬伍控弦貫石動以千數其營則龍衛神勇飛山雄武奉節拱聖忠靖宣效吐澤金吾擲颺萬勝渤海廣備雲騎武肅材能蹶張力能挾輶投石超距索鐵伸鈎水執鼃鼃陸拘羆貅異黨之寇大邦之讐電驚雷擊莫不繫纍而為囚

於是訓以鸛鷺魚麗之形格敵擊刺之法剖微中虱貫
牢徹札揮鉞擲鍊舉無虛發人則便捷器則犀利金角
丹漆脂膠竹木以時取之遴棄惡弱割蛟革以連函劇
兇貉以為弭刺魚服以懷鰭百工備盡鋸磨鏤削其成
鑒鋼而銀鑢植之霜凝而電爍故有彊衝勁弩雲梯幢
車修鍛延鋌鈇戈兌及繁弱之弓肅慎之矢谿子之弩
夫差之甲龜蛇之旄鳥隼之旗軍事早正用戒不虞其
次則有文昌之府分省為三列寺為九殊監為五左選

為文右選為武曰三十房二百餘案二十四部黜隋之
陋更唐之故補弊完罅剔朽焚蠹人夥地溥事若織組
滋廣莫治疊疊成蠱纖弱不除將勝戕斧雖離婁之明
目迷簿書而莫覩豪胥倚文以鬻獄庸吏瘵官而受侮
各懷苟且以逃責孰肯長慮而却顧官有隱事國有遺
利紛訟牘於庭所繫累囚於囹圄此浮彼沉甲可乙否
操私議而軋沕各矛盾而齟齬於是合千師之離散儼
星羅於一字千梁負棟萬楹鎮礎誅喬松以為煤空與

山而劓楮官有常負取雄材偉器者以充其數上維下

制前按後覆臂如長蛇扶其脊膂而首尾皆赴闔戶而

議飛檄乎房闥應荅乎秦楚披荒榛而成徑繹綴緹而

得緒崇善廢醜平險除穢纖悉不遺乎一羽於是宣其

成式變亂易守者刑之所取貽之後昆永世作矩至若

儒官千楹首善四方勾襟逢掖袞衣博帶盈仞乎其中

士之匿華鏹采者莫不拂巾衽褐彈冠結綬空巖穴之

幽邃出郡國之遐陋南金象齒文旄羽翮世所罕見者

皆傾囊鼓篋羅列而願售咸能湛泳乎道實沛然攻堅而大叩先斯時也皇帝悼道術之沉鬱患詁訓之荒繆諸子騰躍而相角羣賢駘蕩而莫守黨同伐異比妍彼醜挈俗學之蕪穢詆淫辭而擊掊滅冥冥之熒燭仰天庭而覩晝同源共貫開天發蔀於是俊髦並作賢才自厲造門闡而臻壺典騁辭源而馳辯囿術藝之場仁義之數溫風扇和儒林發秀宸眷優渥皇辭結糾榮名之所作慶賞之所誘應感而格駒行雉响磨鈍為利培薄

為厚魁梧卓行撝鋒露穎不驅而自就復有珮玉之音
邊豆之容絃歌之聲盈耳而溢目錯陳而交奏煥爛乎
唐虞之日雍容乎洙泗之風誇百聖而再講曠千載而
復覲又有律學以議刑制算學以窮九九舞象以道幼
稚樂德樂語以教世胄成材茂德隨所取而咸有若夫
會聖之宮是為原廟其制則般輸之所作其材則匠石
之所掄萬指舉築千夫運斤揮汗霏霧吁氣如雲鼗鼓
弗勝靡有諗勤赫赫大宇有若山涌而嶙峋下盤黃壚

上赴北辰蕊珠廣寒黃帝之宮榮光休氣腫朧往來蔥
蔥鬱鬱而氤氲其內則檐檠檠題亲檻楹栢閤拱闥闥
屏宇閤閤聳張矯踞龍征虎蹲延樓跨空角道接陳黝
堊備昡燦爛詭文菱阿芙蓉之流漫驚波迴連之瀼泔
飛仙降真之縹緲翔鵷鷖之氍毹地必出奇土無藏
珍球琳琅玕璠璣瑶琨流黃丹砂玳瑁翡翠垂棘之璧
照夜之蠙鵠象鬣角剗犀剗玉鏤刻雕鏤其妙無倫焜
煌煥赫璀璨錯輝映繁星有爛彤霞互照軒廡所繪功臣

碩輔書太常而銘鼎彝者環列而超造龍章鳳姿瑰形
瑋貌文有伊周武有方召猶如謇諤以立朝圖寧社稷
指斥利害踟躕四顧而不撓其殿則有天元太始皇武
儷極大定輝德熙文衍慶美成繼仁治隆之名重曠隆
準天日炳明皇帝步送百寮拜迎九卿三公挾輔扶衡
儀仗衛士填郭溢城於時黔首翹集百作皆停地震嶽
移波翻海傾足不得旋耳不得聽神既安止窮問微巷
惟聞咨嗟歎異之聲於是山罍房俎犧樽竹籩踐列於

兩楹瞽史陳辭宰祝行牲案芻豢之肥臞視物色之犂
騂登降裸獻百禮具成至於天運載周甲子新歷受朝
萬方大慶新闢於時再鼓聲絕按稍收鐃儼三衛與五
仗森戈矛與戈戟探平明而傳點趣校尉而唱籍千官
驚列以就次然後奏中嚴外辨也撞黃鐘以啓樂合羽
扇以如翼欣飛道駕以臨座千牛環帝而屏息爐煙既
升寶符奠瑞聆乾安之妙音仰天顏而可覲羌夷束髮
而蹈舞象胥通隔而傳譯宣表章以上聞奏靈物之充

斥羣臣乃進萬年之觴上南山之壽太尉升奠尚食酌
酒樂有嘉禾靈芝和安慶雲舞有天下大定盛德升聞
飲食衍衍燔炙芬芬威儀孔攝而中度笑語不諱而有
丈故無族譚錯立之洞衆躡廣布武之紛紜蓋天子以
四海為宅有百姓而善羣廷內不灑埽而行禮則天下
雲擾而絲棼故受玉而脩知晉惠之將卒執幣以傲知
若教之不存聞樂而走者為金奏之下作雖美不食者
為犧象之出門賦湛露彤弓而武子不敢荅奏肆夏大

明而穆子不敢聞蓋禮樂之一缺則示亂而昭昏是以
宣王享士貴以穀祿而刑三晉之法高祖因叔孫之制
而知為帝之尊豈治朝之禮物尚或展翳而沉湮此所
以舉墜典而定彝倫者也其樂則有咸池承雲九韶六
英采齊肆夏簫韶九成神農之瑟伏羲之琴嵒氏之鐘
無句之磬鏗鏗鏗鏘和氣薰蒸於以致祖考之格於以
廣先王之聲昔王道既弱淳風變澆樂器遭鄭衛而毀
矇瞽適秦楚而逃朝廷慢金石之雅正諸侯愛歌管之

教嘈文侯聽淫聲而忘倦桓公受齊樂而輟朝季子始
無譏於鄒仲尼乃忘味於韶故使制度無考中聲寢消
非細則楸非庠則高惟今也求器得耕野之尺吹律有
聽鳳之簫或灑或離或鼗或馨或鏞或棧或箏或箏衆
器俱舉八音孔調鸞鸞離丹穴而來集鳴嗈喈而舞修
翻入有賓旅巴渝之舞傑休狄韞之倡遠人面內而進
跋踰山海而梯航故納之廟者周公所以廣魯觀之庭
者安帝所以喜其來王若其四方之珍以時修職取竭

天產發窮人迹砥其遠邇陳之藝極厥材竹木厥貨龜
貝厥幣錦繡厥服締綌綌綌貢羽毛祀貢祭物嬪貢絲枲
物貢所出器貢金錫礪砥砮丹鈇松怪石惟金三品惟
土五色泗濱浮磬羽畎夏翟龍馬千里神茅三脊方箱
櫛棐肆陳乎殿陞豐苞廣匱亟傳乎騎驛連檣結軌川
咽塗塞邪許終歲而不息至於羌氏蜨翟儋耳雕脚獸
居鳥語之國皆望日而趨累載而至懷名琛拽馴獸以
致於闕下者旁午乃有帛氎罽毼蘭干細布水精琉璃

軻蟲蚌珠寶鑑洞膽神犀照浦山經所不記齊諧所不
覩者如糞如壤軫積乎內府或致白雉於越裳或得巨
葵於西旅非威靈之遐暢孰能出瑰奇於深阻蓋徼外
能率夾種來以修好則中土當有聖人出而寧宇然皇
帝不寶遠物不尚殊觀抵金於漸巖之山沉玉於五湖
之川洞剝之劍迺入騎士之鞘齧膝之馬或服鼓車之
轅至於乾象表貺坤維薦祉靈物仍降嘉生屢起暈適
背鑄虹蜺抱珥鳴星隕石怪飈變氣垂白駘背者不知

有之況能言孺倪豈獨此而已也復有穹龜負圖龍馬
載文汾陽之鼎函德之芝肉角之獸簫聲之禽同穎之
禾依生之穀游郊棲庭充畦冒時非煙非雲蕭索輪囷
映帶乎闕角慈蔚乎城壘鷺鳥不攫猛獸不噬應圖合
牒窮祥極瑞史不絕書歲有可紀發微子於是言曰國
家之有若是歟意者先生快意於吻舌而及此邪先生
曰國家之盛烏可究悉雖有注河之辯折角之口終日
危坐抵掌而談猶不能既其萬一此特汴都之治迹耳

子亦知夫所以守此汴都之術古昔之所以興亡者乎
客曰願聞之先生曰繫此寰宇代狹代廣更張更弛黃
帝都涿鹿而是為幽州少昊都窮桑迺今魯地伏羲都
陳帝嚳都亳堯都平陽迺若昊天而授人時舜都蒲坂
乃覲羣后而輯五瑞公劉處豳而兆王業之所始太王
徙邠者以避狄人之所利文王作豐方蒙難而稱仁武
王治鎬復戎衣而致乂蓋周有天下三百餘年而刑措
不用及其衰也亦三百餘年而五霸更起星離豆割各

據穀兵以專列強侯脅帶於弱國不領人君之經費天下日蹙而日裂中國所有者無幾當時權謀為上雌雄相噬孰有長距孰有利背兵孰先選糧孰夙峙孰有翹關之卒孰有憑軾之士孰有素德孰有強倚孰欲報惠孰欲雪恥或奉下邑以賂讐或舉連城而易器骸骨布野甲冑生蟻肘血丹輪馬輦銷髀勢成莫格國墟人鬼噫彼土宇凡幾吞而幾奪幾完而幾弛秦中形勢之國加兵諸侯如高屋之建瓴水神皋天邑以先得者為上

計其他或左據函谷右界褒斜號為百二之都東有成
皋西有崤澠定為王者之里以至置春陵之俠客興泗
上之健吏扼襟控咽屏藩表裏名城池為金湯役諸侯
如奴隸拓境斥地蹠躡荒裔東包蟠木西卷流沙北繞
幽陵南裏交趾厥後席治滋永泰心益侈或慢守以啓
戎或朋淫而招宄橫調無藝而垂竭游役不時而就斃
盧今日縱而不繼鷺翮厭觀而常值睚眦則覆尸而流
血愉悅則結纓而珮璲粉墨雜糅賢才逆曳腫微新黏

而竊肉食賊臣迴穴而圖大器郡國制節侯伯方軌或
為大尾而不掉或為重腿而屢蹇室有丹楹城有百雉
朝廷無用於揚燎冠冕不朶於執贄天維披裂地軸朶
視羣生隻難而殄瘁雖有城池周以鄧林縈以天漢曳
輦可以涉崇巘設汴可以濟深水故武侯浮西河而下
自哆其地而進戒於吳起蓋稅政肆於廟堂之上則敵
國起於蕭牆之裏矣問左孟門而右太行左洞庭而右
彭蠡發微子曰天命有德主此四方如輻之拱轂如桷

之會極其砮鞏者天與之昌其闕殲者天與之亡且非
易之所能壞亦非險之所能藏非愚之所能弱亦非賢
之所能彊故將吞楚也白蛇首斷於大澤將繼劉也雄
雉先雖於南陽龍蓀出積而縻弧隱亡周之語蓐收襲
門而天帝貽刑虢之殃人力地利信不能偃植而支仆
而皆聽乎彼蒼故鯨鯢勸解決一死於吻血兕虎鬬鬬
踐巍嶽為平岡蹂生靈如塌塊簸天下如揚糠其敗也
抉目而析骨其成也頂冕而垂裳由此觀之土地足以

均沛澤而施靈光而已易險非所較賢否亦未可議也
先生曰以易險非所較者固已乖矣以賢否非議者烏
乎可哉客不聞王公設險以守其國有德則昌者乎地
欲得險勢欲參德迫隘卑陋則無以容萬乘之扈從供
百司之廩餼據守偏隅則無以限四方之貢職平道里
之遠邇撫原申區割宅製里走八極而奔走正南面而
負宸舉天下於康逵力士轡而不敢取貪夫汗縮不敢
睨者恃德之險也襟馮終南太華之固背負清渭濁河

之注搯人之吭而拊人之脊一日有變而萬卒立具然
而布衣可以窺隙而試勇匹夫可以爭衡而號呼被天
府之行沃適為人而保聚此以地為險者也地嚴德暢
然後為神造之域天設之阻大哉炎宋帝眷所矚而此
汴都百嘉所毓前無湍激旋淵呂梁之絕流後無太行
石洞飛狐句望浚深之巖谷豐樂和易殊異四方之俗
兵甲士徒之須好賜匪頒之用廟郊社稷百神之祀天
子奉養羣臣稍廩之費以至五穀六牲魚鼈鳥獸闔國

門而取足甲不解纍刃不離韜秉鉞匈奴而單于奔幕
抗旌西轍而冉駝愷伏南夷散徒黨而入質朝鮮畏菹
醢而修睦解編髮而頂丈弁削左袵而曳華服逆節躑
躑而取禍者折簡呼之而就戮眈眈帝居如森鋌利鏃
之外向死士逡巡而莫觸仁風冒於海隅頌聲溢乎家
塾伊昔天下阡危王猷失度皇綱解紐嗥豺當路帝懷
寶歷未知所付可受方國莫越藝祖圖緯協期謳謠扇
孺赤子雲望而風靡英雄螽趯而蠅附玉帛駿奔者萬

國冠冕充塞乎寰宇絕塞稅鎧而免軸障壘熄燄而摧
櫓拜檻神威有此萬旅奕世載德茂聞過舉髮櫛禾耨
子攜稚哺擊果懋穗拔惡鑒撫鉏觚角之磻刻荆欂櫨
而牧圉爰暨皇帝粉飾朴質稱量纖鉅錚錚奏廟之金
玉璨璨夾楹之簠簋訓典嚴密財本豐阜刑罰糾虔布
施優裕田有願耕之農市有願藏之賈草竊還業而斂
迹大道四通而不啟車續馬連千百為羣肩輿捆載前
却而後跂踟搏壤歌号者萬井未聞歎憂而告瘡雖立墳

為界其誰敢擗膊以批捍況此汴都者乎抑又有天下
之壯客未嘗覩其輿也且宋之初營是都也上睇天時
下度地制中應人欲測以聖智建以皇極基以賢傑限
以法士坦以大師屏以大邦扞以公侯城以宗子以義
為路以禮為門鍵鑰以柄開闔以權埽除以政周裹以
恩迺立室家以安吾君有庭其桓社稷臣也有挺其桷
衆材會也有闡孔張通厥明也有牖孔陽達厥聰也其
檻如衡前有憑也其壁如削後有據也其陞則崇止陵

踐也其極則隆帝居中也邑都既周宮室既成於是上
意自足迺駕六龍乘德輿光警蹕由黃道馳騁乎書林
下觀乎學海百姓欣躍莫不從屬車之塵而前邁妙技
皆作見者膽碎迺使力士提挈乎陰陽搏腕乎剛柔應
乎成器方圓微碩或粉或由隨意所裁上方咀嚼乎道
味斟酌乎聖澤而意猶未快又欲浮槎而上窮日月之
盈昃尋天潢之流派操執北斗之柄按行二十八星之
次奪雷公之枹收風伯之韞一瞬之間而甘澤霂霂因

字彗於幽獄敷景雲而黯靄統攝陰機與帝唯諾而無
闕如此淫樂者十有七年疲而不止諫而不改吾不知
天王之用心但聞夫童子之歌曰孰為我已孰釐我載
茫茫九有莫知其界客乃覩覩然驚拳拳然謝曰非先
生無以刮吾之矇藥吾之瞶臣不能究皇帝之盛德謹
再拜而退

欽定四庫全書薈要卷一萬七千二百五十三

兵部

御定歷代賦彙卷三十四

都邑

廣汴賦

有序

宋

李長民

臣竊惟皇宋藝祖受命奠都於大梁於今垂二百載列
聖相承增飾崇麗煌煌乎天子之宅棟宇以來未之有
也昔在元豐中太學生周邦彥嘗草汴都賦奏御神考
遂託國勢之重傳播士林然其所紀述大率略而未備

若乃比歲以來宮室輪奐之美禮樂聲容之華則又有
所未及臣愚不才出入都城十年於茲矣耳目所聞見
亦竊得梗槩輒鼓舞陰陽以鳴國家之盛因改前賦而
推廣焉始則本制作之盛者分方維而第之中以帝室
皇居之奧任賢使能之效而終之以持守冀備一覽之
末為賦曰

有博古先生自下國而遊上京遇大梁公子於路相
與問荅傾蓋如故因縱言至於都邑先生乃援古而

證之曰我聞在昔受命帝王繼天而作首定厥都用
植諸夏之根本肇隆億載之規模若乃賁飾恢宏之
美概見於書經營先後之次備載於禮宅中圖大則
有姬公之明訓權宜拓制則自蕭公而經始予不敢
高譚羲皇遠舉夏商試即周而陳之二華對峙八
川交注褒斜隴首之攸屈函谷二嶠之並據此宗
周所都或假山河之險固漢高因之而啓帝祚焉孟
津後達大谷前通導以伊洛瀍澗之澤控以成皋廣

武之衝此成周所都適當天地之正中光武因之而成帝功焉畢昴之次河冀之津風俗漸乎虞夏疆域連乎齊秦魏都之爽塏信無倫也衡嶽鎮野龍川帶垌列戈船於三江儲戎車於石城吳都之雄壯信足稱也接壤邛笮通商滇越地蕃竹木之產民厭稻魚之食蜀都之富饒信無敵也凡茲都邑之盛實麗美而爭雄旁睨而論雖辯若炙輠繼日而莫能窮公子聞之始若睥眄已而哂曰先生於古誠博矣孰若

我目覩汴都之偉觀乎顧其所以設險則道德之藩仁
義之垣豈獨依於山川所以建中則皇極在上九疇咸
若豈必宅於河洛其爽塏也有如上帝清都神人五城
軼人寰之塵壒極天下之高明其雄壯也有如勾陳羽
林天兵四拱威震則萬物伏怒刑則四夷竦其富饒也
有如海含地負深厚莫測追魚麗之盛多邁騶虞之蕃
殖彼兩漢之雜霸雖仍乎周家之舊墟三國之鼎峙雖
臨乎一方之都會舉而論之於今日正猶拳石涓水欲

與五嶽四瀆之比擬所謂談何容易先生曰余生長太平和氣中亦既有日而處於蓬茨之下無有遊觀廣覽之益驟來神州恍然自失目雖駭乎闕庭樓觀之麗而未悉其制作之意耳雖熟乎聲明文物之英而未究其禮樂之情子年在英妙博聞強記幸為我索言之公子曰僕寔不敏切聞先進有言昔自唐室不競王綱浸圯陵夷五季紛綸四紀上帝憫斯民之塗炭眷求一人作之君師肆我藝祖應天順人出御昌期若時衆大之居

寔古大梁之域在漢則郡以陳留而命名在唐則軍以
宣武而分額考其地望雖卓犖乎諸夏而川流休氣猶
盤礴而鬱積時乎有待世孰能測洎梁祖之有作始建
都而畫圻匪梁人之能謀天實啟之匪天私於有梁實
兆宋基觀夫分野之次舍則房心騰其輝實沉寄其曜
仰星躔之有赫直皇居而久照察夫土脈之豐衍則高
者磊砢下者墳壚廓坡陀之塏澤極灌溉之膏腴語地
形之高兮則自泗而西涉川上歷濰陽遂東至於通津

岡阜隱鱗煙雲飛屯其上鬱律勢與天連語汴渠之駛
兮則自鞏而東達時門抵宣澤障洪河之濁流導溫洛
之和液中貫都城偃若雲霓泝湍悍而不窮上接雲漢
之無倪語雉堞之固則偉拔金墉繚以湯池仰憲太微
之象屹臨赤縣之畿語郊闔之壯則密拱中宸高映四
野揭華榜以干霄謹嚴更而警夜維是都之建也雖自
於梁逮藝祖而始興至高宗而浸昌列聖相承洎於今
日當國家之間暇肆乘時而增葺遂跨三都越兩京擬

二周而抗衡數其南則神霄之府上應南極偉殊祥之
創見恍微妙之難測歲在丁酉大闡真機用端命於玉
帝而彰信於羣黎爰設定命之符妙以蟲魚之篆繼乾
元之用九參八寶而垂範乃嚴像設祇奉茲宮儼一殿
以居上總諸天而位中靈地上嬪列於西仙伯天輔列
於東諤諤羣卿義冠景從往往名在丹臺而身為世輔
像圖孔肖後先攸序闢金堂啓玉室駭寶輪之飛動森
鸞仗之紛飾其側乃有元命之殿實總位於衆福本始

載叶歲禮惟穆罄華封請祝之誠效天保無疆之卜若
其陽德之建咸秩火神於赫煒燁厥位惟尊次曰大火
時謂大辰配曰閼伯以序而陳原夫帝業之創自於宋
地蓋乘是德而王天下飾之靈鉦赤文婀娜舉以示衆
遂定區夏豈必赤伏合信於鄔南之亭豈必神母告符
於豐西之夜主上承紀奉祀致嚴審辰出戌入之度有
視慈禮明之占遂維五帝之象夏體重離而面南諧祉
聲於樂府驗朱草於靈篇火得其性景貺昭然瞻彼煌

煌位在南端厯太微以受制避心星而載還相我昌運
於千萬年出南薰望泰壇隱若天高渾若天圓欽崇於
茲僉曰稱焉先是有司循國舊貫明宮齋廬悉取繒繡
後洎紹聖端誠攸建精意孔昭禮文彌粲主上改元之
初載辛巳長至始親郊見逮至癸巳之歲蓋四舉茲禮
矣申敕春官益嚴祀事於是規法三代祭器肇新躬秉
玄圭天道是循百官顯相齋戒惟寅帝登玉輅皇衢載
遵已而日景晏溫天真降臨衣冠幢節之輝映綵仗輦

輅之參差豈徒若見於渭陽而接拜於天門仰重瞳之
四矚聳羣目而動心乃闢琳館揭號迎真用伸昭報以
福斯民度玉津抵天田王者之藉厥畝惟千上春展事
務崇吉蠲於時農祥晨正東作是先載黛耜於玉輅啟
雲幄於紺壇蔥騊駼服於廣阼之側青旗晦靄於黃麾
之間帝御思文飭躬禱專屈帝尊以秉耒動天步而降
軒三推告畢貴賤以班遂播青箱之嘉種以成高廩之
豐年然後穫之程程瑞禾是導郊廟明堂之大享親奉

梁盛以致告豈惟率天下之農而敦本蓋時勸天下之
養而致孝層臺宕堯上觀昭回厥基孔固下鎮地維儀
象一新於焉具設上下互映俯仰並察天體斯著辰曜
斯列鼇雲上承金蚪四匝察璿璣玉衡之制兼馮相保章
之法陋靈臺銅渾之規斥周髀宣夜之說於以觀星則
進退伏見不失於正於以觀雲則分至啓閉各得其應
以候鐘律則清濁之均協以候晷景則長短之度稱遂
與天地合其德日月合其明休徵既効叢祥並膺至若

祕書之建典籍是藏法西崑之玉府萃東壁之餘光凡
微言大義之淵源祕錄幽經之浩博貫九流包七略四
部星分萬卷綺錯犀軸牙籤輝耀有爍金匱石室載嚴
封鑰或資討論則分隸於三館或備奏御則會粹於祕
閣以至字畫所傳則妙極六書巧窮八體有龜文鳥蹟
之象有鳳翥龍騰之勢真偽既辨衆美斯備圖畫所載
則三祖餘範七聖妙跡列名馬於曹韓覽古松於韋畢
繫絕藝之入神駭衆觀而動色肇建古文宏璉豐敞擇

一時之英髦命於焉而涵養天下歆豔不啻登瀛洲而

隱藏室名卿鉅公由此塗出若夫龍津所在大闢賢關
作庇寒士今踰百年勒豐碑以正文字之訛建華構以
閣載籍之傳其中則鼎新大成之庭寅奉宣聖之祀象
肖尼山制侔闕里其配享也惟顏孟之亞聖其從祀也
多鄒魯之儒士儼威儀之若存肅衣裳而有偉至於庠
序學校之教也首善於京自熙豐始乃詳備講說謹嚴
課誦規繩以勵其行舍選以作其氣發揮詩書之奧頓

革聲律之敝爾乃采芑新田育莪中沚人材於此乎輩
出聖道因之而不墜其西則用建原廟近倣元豐倂圖
程度罔或不同朱薨相望而特起縹垣對峙而比崇界
以馳道之廣臨乎魏闕之雄祥煙瑞靄煥爛蒙龍大明
以奉神考重光以奉哲宗父子之親彌篤兄弟之義彌
隆屆四孟之改律感節物於春冬愴衣冠之出游軫羹
牆於帝衷既進祠於東宮之七殿御潔誠以致恭想睟
容之如在備享獻而肅雖參以時王之禮肆浸盛乎威

容飭茲惟謹稽首拜顙牙盤或薦玉饌惟充有飫其香
齋誠默通顧靈心之響荅宜福祚之延洪乃若中臺所
寄衆務泉穀象應乎文昌運侔乎北斗四方利害於是
乎上達二省政令於是乎下究爰即西南亢爽之所度
宏基而易舊太社為之嚮西掖直其後形勝潭潭不侈
不陋列屋前分是為六部自吏洎工位於左自戶洎刑
位於右公庭肅若百吏輻輳於是糾以虞舜黜陟之公
輔以周公訓迪之志黠胥不能措其姦慢吏不能逃其

責秩秩乎天地四時之聯各率屬而分職有倫有要有
典有則用能效臂指之相應總紀綱而並飭至如天府
之雄統以京尹民物浩穰於三輔之墟聚邑列布於千
里之軫風俗樞機教化原本當府庭之既徙肇分曹而
務謹職業斯勵名實斯允爰擇撥煩之才俾長治於爾
寮南司之俗坐革循訟之積弊原廟之近人無箠楚之
喧囂遭承平之日久匪彈壓之是務皇仁如天萬物覆
露矧茲輦轂之下日薰陶而厭飫不得已而用刑每哀

矜於桔拳日無滯訟歲無留獄貫索之象既虛園扉之
草斯鞠巍巍乎帝王之極功頌聲作而民和睦爾乃背
宜秋出城阿神池靈沼相直匪賒象苑園之非一聚衆
芳而駢羅神木千歲而不雕仙卉四時而常花宗生族
茂厥類實多當青鳥之司扉開條風之妍暖命嗇夫而
啟禁縱都人而游覽吾皇踐祚之五載六飛始御於苑
門蓋將順民心之所樂達餘陽於暮春指金明而駐蹕
觀曼衍之星陳蘭橈飛動綵仗繽紛帝曰斯樂予何敢

專遂踐瓊林宴寶津零湛露於九重均禊飲於羣臣先
朝之遵故事張大侯以示民於以戒不虞於平世勵武
志而彌勤其北則營壇再成亶為方丘峙柔祇之歆饗
故坤輿之是侔考一代合祭之失實千載循襲之尤敦
牂比至曠典聿修帝躬臨乎澤中即陰位而類求配以
烈祖之尊侑以嶽瀆之儔乃奠黃琮震於神休乃奏函
鐘格彼至幽澄宿氛而不雨暢協氣以橫流顧瞻空際
密邇靈旂有持戈者有執戟者有質若獸者有喙若鳥

者地之百靈祕怪感帝德而來游景光為之燭曜祥雲

為之飛浮侍衛駭愕莫測其由哀時之對上軌成周豈

若漢祠后皇徒歌乎物發冀州至其棣萼之庭建蓋示

優於同氣主上欽承永泰之基益隆則友之義兢兢業

業欲偕追述之志永紹裕陵垂法萬世載因心以撫存

肆匹休於棠棣爵以真王之封陟以上公之位褒以兩

鎮之節厚以三錢之賜俾遂安其居宇咸克保乎富貴

何愧建初歲之入豐也每歲時之衍樂儼鴈齒而密侍

和樂且湛靡拘堂陞笑言之適無間勸侑之勤有繼飲
酒之飫既翕既醉何愧花萼之盛也乙未之春龍翔效
瑞脊令來集數以萬計嘉首尾之胥應感昆弟之是類
灑宸翰以體物用闡明乎至意若乃帝假有家明內齊
外自天申命本支昌熾考祥羆之應夢演慶源而毓粹
藹螽斯蟄蟄之衆假樂皇皇之懿受祉而施於孫子既
侔乎周王多男而授之職又合乎堯帝肇正元嗣於春
宮申眷後王而加惠冠禮薦行三加攸次詔以成人之

道載隆出閣之制卜吉壤以圖居惟宮隅之是邇標蕃
行之美名彰我家之盛事顧起處之獲寧信皇慈之曲
被於此賓師友簡僚吏習禮節講儒藝日奉朝著克勤
無怠拳拳乎上承忠孝之訓而臣子之義備至若宗正
著錄枝派實繁上及曾高下及曾玄分宅廣睦恩義兩
敦第族屬之踈戚班秩祿以惟均遠則褒崇藝祖之胄
近則加厚濮邸之孫配天其澤同姓悉沾歌湛露詠行
葦戒杜杜鄙葛藟考親親於伐木繼振振於麟趾於赫

帝命屬籍是典皇宗取則率遵繩檢歲月薰陶朝夕漸
染藹藹賓興之才擢儒科而登仕版時則有清靜如辟
疆忠精如更生文若東阿勇若任城莫不激昂自奮騰
實飛聲於是參親踈而兩用冀羽儀於王國遂壯周家
之藩屏固漢宗之磐石若夫由朱雀以縱觀下天漢而
北望千門萬戶併將有伉言觀其陽則仍宣德之舊稱
定五門而改創其始也憲姬甯摹大壯揆吉日命大匠
庶民子來則靡煩於磬鼓瓌材山積則又疑於神貺其

上則藻色麗乎方井雲氣萃乎修楣躍水波乎柏棟列
繡文於蘭栢罔不隨色象類因木生姿窮奇極妙豈人
能為若有鬼神異物陰來相之其旁則檐牙高張欄楯
周布往往雕鸞刻鳳盤獸伏虎或連拳欲立或猛據若
怒或奮翼東廂或圍首西序殊形詭制見者內怖於以
自中夏而布德總八方而為極披路三條則桎栝森以
相連立觀兩隅則杲恩儼以並飾善頌落成上下用懌
言觀其陰則堯堯北闕時謂景龍於焉採民謠於焉觀

民風閼夫闐闐則九市之富百廛之雄越商海賈朝盈
夕充乃有犀象珠玉之珍刀布帛貨之通冠帶衣履之
巧魚鹽果蓏之豐貿遷化居射利無窮覽夫康衢則四
通五達連騎方軌青槐夏蔭紅塵畫墀乃有天姬之館
后戚之里公卿大臣之府王侯將相之第扶宮夾道若
北辰之蕃衛太平既久民俗熙熙徒觀夫仙倡效伎佞
童逞材或尋橦走索戲豹舞罷則觀者為之目眩或鏗
金擊石吹竹彈絲則聽者為之意迷亦有蜀中清醪洛

下黃醅蒲萄汎觴竹葉傾巵羌既醉而飽德謂帝力何
有於我哉瞻彼艮維肇崇琳闕始真天祥昉分彪列妙
道由是聿興至教於是旁達辛卯之夢既符壬辰之運
斯協外則立仁濟輔正之亭行玉筭考名之法博施於
民俾絕天關神符一出羣邪四驚馘毒治病功深效捷
內則艮嶽屹以神秀介亭聳以巖葉天人交際之夕清
供於此備設俄而玉笋自傾寶劒如掣駭雷霆之轟轟
靈囿下兮雜還逮夫應鍾紀律里社開祥凡預臣子之

列欲傾頌禱之誠即茲宮以效報期萬壽之無疆於時
演大梵希夷之旨諷太玄空洞之經遂頒祕錄八百聯
名猗彼乾維龍德是營地直天奧上鬱化清有岡連嶺
屬之勢有龍盤虎踞之形儲休發祥繫我聖明惟崇飾
之彌麗正土木之夸矜盖示不忘其所自為萬世之式
程彼漢之代邸既瑣瑣焉唐之興慶又奚足稱爰有瑤
池波湛翠水淵渟峨方壺起蓬瀛大君戾止廣殿歡騰
九奏備八佾成凡左右侍宴者恍若躡神山而遊紫清

戊戌之冬太一次於黃祕之廷其位在西北則臨乎是
宮之地於辰為闍茂適契於元命之晶詔鳩工以基迹
用揭虔而妥靈十神載別五福來寧至於端闈之內大
慶眈眈路寢斯在有大符貺於此乎躬受有大祭祀於
此而齋戒日精東承月華西對重軒三階翕絕動彩左
城右平相與映帶睨靈光猶培塿晞景福之叢芮春王
三月履端匪懈庭燎有光禁漏斯艾供張既盛法物咸
萃乃建招搖欵以環合蒲牢發乎輕蓋正宁當陽天極

是配九賓星拱垂紳委佩樂奏乾安間以韜韞上公薦
壽捧觴跪拜天子萬世兆民永賴其左則合宮之制高
出百王上圓下方法象乎天地九筵五室經緯乎陰陽
旋四序之和於四阿達八風之氣於八窓淵衷默定聖
畫允臧重屋告成光我家邦於以饗帝而饗親則日卜
上辛時丁肅霜樂調黃鍾享維牛羊爰熙太室恭薦馨
香肆推尊於神考用嚴配於上蒼於以視朔而布政則
春朝青陽秋覲總章冬遇平朔夏宗明堂玉冊以極其

變內經以考其常欽授於人遂正天綱其右則微調之
閣凝嚴密靜神鼎內藏天所保定俾郊鄆之永固笑甘
泉之匪稱其始禱也窮制作之妙於繫表得隱逸之士
於草茅一鑄而就光應孔昭其始定也夜出九成不吳
不敖龍變光潤氣明煙消惟鼎鬲之重作鎮神皋數極
九變彖該六爻屹然中峙增崇廟朝曰蒼曰彤以奠齊
楚之域曰晶曰寶以奠秦趙之郊有位東南有位西南
者有位東北有位西北者分方命祭罔或不調宜乎卜

世卜年過於周歷永保茲器與天無極至其內朝則祥
曦延和清穆顧問親臣侍列禁衛彌慶治朝則紫宸垂
拱丹青有煥一日萬機此為聽斷厥或進拜將相號令
華夷爰即文德播告惟宜燕樂羣臣詳延多士乃御集
英以時歲事又有龍圖天章寶文顯謨以洎徽猷五閣
渠渠奉祖宗之彛訓示子孫之楷模言追盤詰道契圖
書繫祕藏之靡怠仰聖孝之如初次則東西分臺政事
所會始揆而議則可否有著龜之決既審而行則出納

擅喉舌之寄於以幹旋鈞軸輔成至治其在西樞掌武
之庭則有將印之重軍符之嚴爾乃運籌帷幄之中折
衝樽俎之間爰戡五兵坐鎮百蠻其在翰苑摛文之地
則惟密旨是承德意是導爾乃覃恩潤色追風渾灝遂
繼東里之才允符內相之號乃若天子燕息之所也宣
和祕殿翬飛跂翼憲睿思之始謀因紹聖之故跡凝芳
瓊蘭重熙環碧輪焉奐焉光動兩側聽政之暇來游來
息搜古制於鼎彝縱多能於翰墨致一凝神優入聖域

爰命邇臣於焉寓直罄啓沃之丹誠庶密效乎裨益申
紹紀元昭示萬億視彼元狩元鼎神爵五鳳之號詎能
專美於史冊至如后妃親蠶之所也延福邃深有嚴金
鋪當春日之載陽率六宮而與俱懿筐既飾柔桑既敷
鞠衣東嚮三採躊躇風戾川浴地溫氣舒然後龍精報
貺瑞繭紛如五色之絲允侔乎東海八蠶之縣倍富於
吳都爰獻天子祭服所須由此率先天下則無數之化
斯並美於闕雎以至掖門曲榭之奧周廬徼道之肅長

廊廣廡之連延珍臺間館之重複倬然在列璇題輝映
雖使廣延墨客衆集畫史曷足以紀茲區宇之盛先生
聞而稱贊曰汴都之美其若是乎抑何修何飾而臻此
乎公子曰主上以神明資才受天眷命為天下君其所
以圖回宰制獨運榘矱之中者愚不得而測也切仰廟
堂之所先務者任賢使能而已試為子陳之若夫十室
之邑必有忠信天下至廣豈曰乏才觀夫燕趙汝潁之
奇勾吳於越之秀兩蜀文雅三齊質厚以至關東舊相

之家山西名將之胄感會風雲雜然入彀茲神聖之都

是為英俊之躔元精於此回復間氣於此蜿蜒以言乎

儒風則長者之稱自漢而著以言乎世族則文士之盛

自晉而傳隱逸有夷門之操文章出睢渙之間帝賚獄

降運符半千商弼周翰接武差肩陋七相五公之紱冕

邁杜陵韋曲之衣冠譬猶倣儻權奇素多於冀野璵璠

結綠自富於荆山上乃以道觀能兼收並取明明在公

濟濟列布同寅協恭相與修輔故得朝廷清明紀綱振

舉威武紛紜聲教布濩東漸鴨綠南泊銅柱深極沙漠
遠踰羌虜陸龍驚水懷奔走来慕雕題反趾左衽辮髮之
俗願襲於華風金革玉樸犀珠象齒之貢願獻於御府
於斯時也治定而五禮具焉則採周官之儀物稽曲臺
之典故考古禮嘉禮之義正婚禮冠禮之序車輿旂常
衣冠服制職在太常各有攸叙功成而六樂舉焉則詔
后夔辨舞行命伶倫定律呂法太始五運之先諧中正
五均之度笙鏞鞀磬琴瑟祝敔職在大晟各有攸部衆

制備羣音叶天地應神人悅修貢效珍應圖合牒上則
膏露降德星明祥風至甘雨零下則嘉禾興朱草生醴
泉流濁河清一角五趾之獸為時而出殊本連理之木
感氣而榮嘉林六目之龜來游於沼芝田千歲之鶴下
集於庭期應召至不可殫形是宜登泰山躡梁甫泥金
檢玉誕揚丕矩奏功皇天登三咸五上猶謙挹而未俞
也於是親事法官之中齋心大庭之館思所以持盈守
成垂萬世之彞憲躬執道樞卓然獨斷仰以順天時俯

以從人願規模則惟寧人之指是循政事則惟元豐所
行是繼其在官也絕僥倖之路汰冗濫之員奏詔者戒
於倚法治民者戒於為姦其在士也納讜言於羣試復
科舉於四遠保桑梓者遂孝養之心在流寓者獲游學
之便其在民也除苛濫之科蠲不急之務農人服田以
效力穡之勤父老扶杖以聽詔書之布將使四海之內
反樸還淳背偽棄末皞皞乎太古之風各安居而樂業
先生聞之歎美不暇乃謂公子曰今日治效如此正臣

子歌功頌德之秋也固惟踈遠之蹤名不通於朝籍雖
欲抽思騁辭作為聲詩少述區區之志君門九重難以
自達則乙夜之覽何敢冀哉因擊節而歌曰麗哉神聖
位九重仁天普被四海同曠然丕變還淳風金革不用
囹圄空千齡亨運今適逢下七制卑三宗微臣鼓腹康
衢中日逐兒童歌帝功歌畢振衣而去公子遂述其事
而理之以總一賦之義焉理曰赫赫皇宋乘火德兮奠
都大梁作民極兮一祖六宗世增飾兮光明神麗觀萬

國兮穆穆大君天所子兮粵自叢霄履帝位兮體道用
神妙莫名兮立政造事亶有成兮金鼎奠邦神姦讐兮
玉鎮定命垂奕葉兮天地並應符瑞著兮應圖合牒千
百禩兮坐以受之開明堂兮三靈悅豫頌聲興兮元臣
碩輔侍帝旁兮相與弼亮守太平兮連丁壬辰化道行
兮已酉復元寶歷昌兮天子萬年躬在宥兮斯民永賴
躋仁壽兮

南都賦

有序

宋

王仲粲

洛陽王仲專侍親客於宋十有餘年矣宋南都也山川
城邑人物風俗禽獸草木博觀而窮覽麤得其凡焉因
藉華陽先生渙上公子為問荅以賦辭曰

華陽先生與渙上公子步於西山之隈環於竹圃之左
曰美哉邈乎土地之沃人物之夥也公子喟然歎曰先
生觀斯而已獨不聞往者之事歟上自五帝中接三代
下訖漢唐目擊而可知指陳而可喻請為先生言之於
顯樂國在睢之陽其地則宋其分則房夏豫周青秦碭

漢梁帶以黍丘之野包以闕伯之疆盟豬出其右汭水
更其旁渙穀濊淮漻漻逐黃從橫馳驚源分派張過乎
隕石之野徑乎龍丘之岡行乎釣臺之渚出乎穀城之
塘上接大河通於銀潢下達渦泗匯於淮湘瀚濶舉濶
淼淼洋洋漭漭瀼瀼潏潏湯湯若乃歷華里經洧陵乘
襄塢陟貫城傍空桐而過沙隨偕鴻口而升橫亭伊高
辛之帝子主大火而修祀鄆葛伯之仇餉猗湯征之攸
始嘉微子之啓封卒繼承於商氏訪桐廬之兩門孰世

遠而難記企蒙城之故邑懷漆園之傲吏登北岡而遠
瞰想橋公之德懿銘三鼎而征鉞曾餘光之未墜仰子
喬之颯馭世獨尚其丘墳臨繪水而徙倚誦相如之高
文閱雙廟之靈宇欽張許之威神忠義煥乎日月世彌
久而逾新英風激乎萬代如想見乎其人觀山川人物
之舊纔得其凡而略之僕固未能詳也若宮室苑囿之
盛池沼臺榭之廣侈靡誇前光輝絕後惟梁孝王有足
稱者僕願繼其說而先生自覽其切焉漢有天下至文

而昌九族敦序帝室以光乃命子武俾侯於梁惟梁大
國城四十餘北限泰山之險西界高陽之墟禦備東南
則九州之奧區焉廣衍沃壤則天下之膏腴焉於是舍
大梁之故土卜睢陽之新都傍洧城而連屬起閣道以
縈紆外廣池洫內經郭郭陋九筵與百堵法上國之規
模發小鼓以始倡下節杵而和之流樂府以度曲豈餘
音之獨遺於是乃作曜華之宮儼阿房與林光鬱正殿
之嵯嶻巍然起乎中央散彤彩而澔泔復煒煒以煌煌

驚蚪龍於金楹乍矯首以騰驤軒鸞翥於飛甍欲乘風而下翔歷太階之寶砌駢璧瑛與玉璫光陸離而眩目足幾往而徜徉旁有曲室後連洞房竄窰窈窕仰不見陽列方疏而散綺玉女睨而悠颺又有宴間之館寔曰忘憂文章灝博卓犖瑰奇者萃乎其中貢以文鹿白鶴參以淥鄣細柳間以連璋沓璧綴以清管弱絲東苑望園三百餘里鵠鷁鷦鷯山鵲野雉守狗戴勝鴈鴒翡翠聲音相聞翺翔往來萬端鱗萃不可勝紀其木則檉松

梗枿楸梧柘檀欒檀木蘭栟櫚豫章華楓翠槐古檜朱
楊雲封霧鎖臨谷被岡其果則楂梨櫟栗素柰朱櫻紫
棗來禽吳橘楚橙其草則蕙若蘭茝薜蘿蕪蓀龍杜衡芹
賞江離芎藭庭蕉聳綠階藥翻紅糝以忘憂合歡之嘉
植雜以避暑延壽之芳叢芬芬馥馥蒙蒙芄芄其竹則
簣簣鐘篳筍箛簞簞疎篁密篠布隴夾池檀藥蒨茸婀娜
娜陸離露滋雪映風靡雲披於是乎複道連繇亘數千
步飛閣層樓動以百數一望平臺與離宮眇眇忘其何

所中有百靈煙嵐奇秀表以落猿之巖環以棲龍之岫
既盤紆以第鬱亦映帶其左右面百尺之深潭瀨鳴玉
之清溜升望秦之峻嶺懷故關而回首維彼羣壘臺在城
之西勢千仞而崛起豈終日之可躋攀未半而神悸意
欲下而復迷驚斗杓之頻逼顧霓鬣之下垂疑真仙之
攸館非人寰之所棲屹清冷之對峙復偃蹇以穹隆上
憑范檻之崢嶸恍忽不知其幾重下瞰清淵之澄澈金
碧倒影乎其中旁接鴈池綠淨漪連秋浪漲雨春波拍

天鶴洲背其後鳬渚面其前棹女謳而蕩槳漁人集而
叩舷水禽則有鵑鷗鴝鴛鴦鷺鷥鷓鴣子鵲侶鴻
儔翔翻翻載沉載浮既瀟灑而隨波暫飛鳴而驚舟
水草則有蘼芡蘋莞蕪葭蒲蔣白蘋綠荇芡實蓮房雨
濯榦而增綠風披華而吐芳王臨是國綽有餘閒思遊
東苑縱獵乎其間於是乘雕玉之輿馴黃裏之馬紛萬
騎之徒驚千乘之駕服太阿之雄劍靡彩虹之珠旂鳴
和鸞以玲瓏翳羽蓋以葳蕤安國奉轡嚴忌附輿扈從

橫出並山之隅左許少右專諸依岡為罝因川為漁奮

駭百獸電激雷驅搃雄螭楚豪豬轉犀犛犇麇麇轢游

蟻躡駟驢矢不安發應聲而殊鋌不虛擲洞胃穿髑山

殫谷盡子然無餘於是梁王弭節而還容與委蛇徘徊

往來其樂未哀相與賓客復遊於鴈鶩之池登龍檻飛

鳳蓋釣錦鱗出文貝弋白鷗挂黃鶴鷦鷯下鸛鵒落薄

暮日斜俛仰極樂獲獸之多弋禽之衆子虛之所遺西

賓之所略也馳騁少怠明日乃燕於平臺召相如延鄒

枚綺席列雕屏開膾脍脍炙豹胎酌金漿之酌觴縹玉
之醕吹紫鳳之簫擊靈鼉之鼓聆遼溟之歌睇巴渝之
舞又有邯鄲曼姬燕代麗女輕祛靚粧綽約媚嫵明眸
微睨色授神予於是衆客皆醉頽然忘歸浩歌起舞獻
壽考無疆之詩曰君王淵穆德日躋閒暇遊宴樂無涯
願千秋兮萬歲常與日月爭光輝先生曰噫公子何謂
茲邪若公子所謂重耳而輕目榮古而陋今膠以人物
之陳迹炫以山川之舊經又烏覩大宋之盛乎夫大宋

之開基也肇自商丘大啓土宇創洪圖而遺億代一帝
統而超邃古萬國被德澤四裔暢皇武西盪巴蜀東澹
海濬北指幽薊南曜朱垠天乙七十里而興王姬周三
十世而卜宅曾何足云至於祥符之際累盛而重熙增
泰山之高禪梁父之基神祇安妥日星光輝寶符瑞應
萃乎斯時於是巡方寓幸亳社動天輅備法駕海夷獻
珍黃雲覆野就見百年存問鰥寡明壹法度赦宥天下
當是時也翠華迴馭龍旆載揚迺瞻茲土如歸故鄉觀

紫氣於芒山辨白水於南陽灑翔鸞之神翰披鴻藻之
天章於是建南京陪上國首諸夏作民極對列乎浚郊
相輝乎洛宅頌慶洞開歸德峻峙若閭闔之特闡連駟
娑與枌桢偉宮室之光明仰觚稜之神麗儉不至陋奢
不逾侈旁立原廟歸罪穹崇殿實有三一祖二宗顯文
謨而承武烈彌萬祀而無窮觀其英豪之域冠蓋相望
元勲雋老五姓實昌蹈先生之學舍溢誦聲以洋洋敬
鄭公之碩德仰文正之餘芳俯浪宕之舊渠迴伊洛之

清流醜江吳之漕粟浮寶鷁之千舟若乃昭仁崇禮迴
鸞祥輝連闌帶闌列隧通畿萬商千賈鱗集羽歸星布
纖麗山積瑰奇來不可抑往不可羈南獠蠻而東獺貊
紛大貝與明璣其軍旅則棘門細柳連總百營馭以驍
將厲以犀兵時以蒐獮之祭陣以魚麗之形扼一都之
衝會耀萬里之天聲其原野則田疇彌望不可計數浸
以曜漁之源被以沃壤之土舉趾即雲荷鋤迺雨芄芄
離離禾麥稷黍其亭館內之則有流觴綠波檜陰四合

照碧妙峰武備道接外之則有朝雨暮雲暖風殘月又有
玉觸金縷光華姝喜嘶馬落帆芳草柳枝之列聯觀光與
望雲指中天之魏闕其池沼則東西二湖淠淠迢迢水澄
似鏡波泛如潮窺馴鷺於別渚識海雁於舊橋爾乃金
魚分籥玉麟剖符輔弼耆德侍從鴻儒鎮撫東土保釐此
都視先王之遺民愛風俗之安舒乘剽繁之多裕覺坐嘯
而有餘陟高臺而環望悟神意之自如臨綠水而暫止宜
放曠於江湖若予之所舉僅知其髣髴十分未得其一

隅吾子徒聞孝王之遺風舊迹不覩大宋之豐功偉烈也徒
詫梁國故墟之名不知藝祖興王之實也徒誇兔園之大鴈
沼之廣不識原廟之尊帝宮之美也曜華故基鞠為茂草
孰若都城佳氣鬱與雲翔諸侯僭上游宴無度孰若天子
巡狩動靜有常珍怪之玩奇木異卉孰若農夫之慶黍稷
稻粱先生之言未終公子矍然若驚惘然若醒茫然若有
所失者既而幡然改曰鄙哉予乎嗟予舍近而取遠習迷
而遂非其亦久矣先生博我以皇道宏我以王圻使數十

年所眩曜釋焉無疑僕雖不敏請終身而誦之先生
於是作歌以遺焉其辭曰翼翼神都皇祖起焉煌煌魏
闕真人巡焉有睟其容三殿位焉於萬斯年天子明焉

王畿千里賦

宋

宋祁

王有一統人無異歸中四方而正位畫千里以為畿總
大衆之莫居式昭民極據方來而處要以重皇威二代
而還維周有制擘庶績以圖大廓多方而為衛作我上
國垂諸永世以謂地非中夏無以示天子之常尊土不

一圻無以待諸侯之入計爾乃測圭於地考極於天風
雨之所交者道里之必均焉郊野錯而迴合鄉遂亘而
蟬聯溝封斯萬疆場且千差籍九畿定夫家於都鄙出
車萬乘括賦入於原田是謂辨方且非期侈廓焉天府
之國魏乎王者之里爵祿命賜之供億朝覲會同之底
止不偏陋以取侮不夸矜而侈美侔江海之重潤乃據
上游法日月之徑圍用張天紀且其蠻夷面內玉帛駿
奔內則百官承式外則四國于蕃化之遠者禮益廣歸

之衆者務愈繁必在制廣輪於有截示極摯於羣元倍
十子男大有由而御小任包旬稍卑不得以侔尊亦由
天之高憐物而無外地之厚廣生而咸賴使高而可度
則寥廓何仰厚而易知則沉潛有害是用控天下以咸
乂極宸居而稱大詩美四方之是則理乃同歸史稱後
世之無加事誠胥會美夫周原膺膺禹畫茫茫或處瘠
為教或建瓴是防然皆按成事於神旬跡前謀於令王
所以漢相論都首識金城之廣召公相宅前知墨食之

祥洪惟我朝奄有方國託宏基於天地亘長藩於道德
所以申畫邦畿是用守之無極

皇畿賦

宋 楊 侃

有賦家者流欲馳名於當世思著詠於神州忽念前古
深懷景慕誦二京於張衡覽兩都於班固於是輟卷意
慙閣筆心伏讓而謂臣請書簡牘臣辭不獲已而謂之
曰予讀二子之賦而知兩漢都邑之制宮殿之麗而未
知大宋畿甸之美政化之始也予幸得職采風謠官參

儒雅千里之郊圻是巡八使之輶車斯假若夫大邑名城神皋沃野畫地可記濡毫可寫至於宮禁之深嚴予未聞也都城之浩穰衆所覩也是故彼述其內子言其外蓋萬分之舉一難盡述而備載昔者唐綱不振國鼎將遷俄梁室之革命啓浚都而應天既觀法於左嶠右隴亦取則於西澗東瀍大矣雄圖昭然聖謨謂陳留天下之衝要謂大梁海內之膏腴漢祖得之則齊楚之敵敗亡相繼咸就擒而即誅梁王守之則七國之師不敢

西向盡為馘而為俘實王氣之長在宜萬世而作都也
莫不廣封溝設險固襄平割宋之美田戴邑裂曹之沃
土滑分屬邑之二城陳滅太康之萬戶潁川之鄆陵扶
溝滎陽之中牟陽武咸命落編氓於州籍升地圖於天
府故得雄臨九州陋視三輔經營歷於五代法則垂於
萬古皇宋之受命也太祖以神武獨斷太宗以聖文誕
敷平江表破蜀都下南越來東吳北定并汾南取荆湖
是故七國之雄軍諸侯之陪臣隨其王公與其士民小

者十郡之衆大者百州之人莫不去其鄉黨率彼宗親
盡徙家於上國何懷土之不聞甲第星羅比屋鱗次坊
無廣巷市不通騎於是有出居王畿挂戶縣籍興屋樹
業出賦供役者矣豈比夫秦選戶口於咸陽漢徙豪傑
於陵邑魏將實於河南驅冀民而是入也今聖上之在
東宮也尊以皇儲尹茲京邑視政之初民訟雲集莫不
察之以情僞辨之以曲直發伏禁姦親剗繁劇既而桴
鼓不鳴豪右斂迹吏不敢欺民用懷德若乃龍樓曉出

奉法謹身教民以事父也親拜師傅降禮國諸教民以
事師也公退則侍講在前出入則四賓是翼尚老尊學
與民為則是時皇畿之內易俗移風以至正南面居域
中由內及外化行令從是君上德惠素立而政教早崇
也若乃銳旅百營高城千雉孫武教陣吳起撫士其齊
如林其猛如虎手擊利劒足張彊弩躍馬奪槊投石拔
距入則訓練出無征戰身間賞厚家有餘羨是故擁彊
兵衛近甸如大郡雄藩為屏為翰者且有九縣天設二

渠曰蔡曰汴通江會海縈畿帶甸千倉是興萬庾是建
杜預主計劉晏司漕何貢何輸吳粳楚稻月致百萬猶
責其少漢之太倉積粟紅腐使彼粒而計之未及我斗
量之數成王之庾萬箱以供未若我千艘往來運江淮
而無窮是故備九年之儲充六軍之給當津處要山積
雲入者復有五邑若乃總戎者貴領專城宰邑者上應
列星簿既資高尉亦秩清率兵守戍者五鎮統騎分巡
者兩路城隍之外遊徼四布桓桓八臣是警是護郊原

膾膾春草萋萋邊烽不警牧馬爭嘶廢空萬櫪野散千
蹄陂間牧南沙平走西一飲空川一齧空原去如霧散
來若雲連地廣馬多古未有焉若乃任土出於民心獻
芹比於古俗園茄早實時果先熟瓜重南門笋宜修竹
鬻於市兮利既兼倍進於君兮恩必霑沐時或戴勝降
桑螵蛸未鳴野人登麥以先至蠶婦貢絲而已成別有
襄陵之桃楊夏之柿朱櫻宜於谷林丹杏出於尉氏其
或陽鄉千樹之梨扶樂千樹之栗比封千戶之侯亦何

讓於昔日鹹壤宜北鄉之羊野莎美東邑之豕魚鼈鳧
鴈之盛西有陂兮萬頃菱芡蓮藕之美東沿堤兮百里
其或仲冬之月禮尚進鮮介麋素出於逢澤校兔復多
於梁園乃命萊田於虞人選徒於司馬四校畢陳六飛
夙駕何千乘萬騎之馳騁滿四通五達之郊野西或過
於圃田之藪東或出於平臺之下乃有孟賁之徒烏獲
之類擅褐而來叱咤而至搏虎兕擊熊豕玄豹逆曳白
狐生致復有負羽從獵之人控弦伏獸之士落孤鴈於

馬首貫雙鷗於雲裏然猶示之以三驅之仁寬之以一
面之網不使獸殫於下禽盡於上何長楊之獵自謂於
禽多雲夢之畋敢誇其地廣哉圖書載詳境土斯見開
封則漢志之名邑今二赤之首冠祥符則天書之降年
易新名於舊縣穗秸之入斯為近甸若乃百萬衆之分
營十二市之環城囂然朝夕異彼郊坰其東則有汴水
之陽宜春之苑向日而亭臺最麗迎郊而氣候先暖鶯
囀何早花開不晚瞻太一之清宮壯先朝之命工構宇

煙霞之外出俗囂塵之中效仙人之樓居慕老氏之玄

風青青道邊千畝何田端拱之初藉於此焉儻耜一執
青史千年登蓼隄以東望見高臺之百尺居道之南在
岡之北下有廣場可馳可逐我皇帝初卽寶位大閱軍
旅親乘戎輅習戰於此士馬秋勁甲冑晨整止憑軾以
將觀衆無譁而是聽列八陣之形申三令之語肅將帥
嚴部伍頗牧授之以方略韓彭進之以旗鼓失軍容者
戮以徇衆有勇敢者賞而裂土彼上林之馳射驪山之

講武豈可同日而語哉其南則有崇崇清壇肅肅齋宮
卜是吉土龜從筮從永奉禋祀郊見昊穹燔柴展禮萬
世無窮別有景象仙島園名玉津珍果獻夏奇花進春
百亭千榭林間水濱珍禽貢兮何方怪獸來兮何鄉郊
藪既樂山林是忘則有麒麟含仁騶虞知義神羊一角
之祥靈犀三蹄之瑞狡狴來於天竺馴象貢於交趾孔
雀翡翠白鷗素雉懷籠暮歸呼侶曉去何毛羽之多奇
罄竹素而莫紀也忽斷苑牆又連池籞介族千狀沙禽

萬類盡游泳而往來或浮沉而出處柳籠陰於四岸蓮
飄香於十里屈曲溝畎高低稻畦越卒執手吳牛行泥
霜早刈速春寒種遲春紅粳而花綻簸素粒而雪飛何
江南之野景來輦下以如移雪擁冬苗雨滋夏穗當新
麥以時薦故清蹕而親至輦從千官郊陳萬騎既觀穫
以云罷亦宴獐而後已其西則有池鑿金明波寒水殿
鷁首萬艘而壓浪虹橋一道而通輦太液無濫觴之深
靈沼有潢汙之淺時或薰風微扇晴瀾始暖命樓船之

將軍習昆明之水戰天子乃駐翠華開廣宴憑欄檻於
中流瞰渺茫於四面俄而旗影霞亂陣形星羅萬櫂如
風而倏去千鼓似雷而忽過則有官名欽飛將號伏波
驤江中之龍避船下之戈黃頭之郎既衆文身之卒且
多類蚪龍而似蛟蜃駭鯨鯢而走鼃鼉勢震動於山嶽
聲沸騰於江河別有浮泛傀儡之戲雕刻魚龍之質應
樂鼓舞隨波出沒鑾輿臨賞以盡日士庶縱觀而踰月
波池之南有苑何大既瓊林而是名亦玉輦而是待其

或桂折天庭花開鳳城則必有聞喜之新宴掩杏園之
舊名於是連鑣上苑列席廣筵蓋我朝之盛事為士流
之殊榮一派如飛通漕駕虛越廣汴湍流之上轉王城
西北之隅貫都注御溝之口轉漕通廣濟之渠京索導
源而於彼金水名河而在茲其北則瑞聖新名含芳舊
苑四方異花於是乎見百疇好鳥於是乎聞十洲凝景
三島分春延殿之設是名天駟伐大宛以新求涉渥洼
而遠至羣驅八騎隊數十驥雖輓粟之千軍乃嘗秣之

一費彼沙臺之崔嵬聳佛刹之千尺岡阜連延於西南
原田平坦於東北何沙海之飛揚忽到此而止息莫不
地多賢士代出異人何干旄之子子向浚郊而雲臻雖
梁多於長者非安國而不聞過信陵之祠宇想英風而
若存何侯嬴之白首尚抱關於夷門遇公子之好賢忽
枉駕而咨詢既同載而過市謁隱屠而駐輪果嘉謀之
斯得救邯鄲而義伸奪晉鄙之十萬終自將而却秦設
守冢而奉祀值漢皇之東巡若乃過陳留之故邑訪地

名之所因蓋二留之分別彼彭城而此陳昔赤帝之起
義會子房而於此始錫賢於上天終受封於茲地既萬
戶以建侯亦千年而崇祀千屯北縣之郭郭三月南河
之鄜市何飛梁之新遷患橫舟之觸柱今之雍丘古曰
杞國民厚風俗土繁貨殖縣之西郊山曰谷林其或花
迎野望煙禁春深景當妍麗俗重登臨移市景日傾城
賞心幄幕蔽野軒蓋成陰暮而忘歸樂不絕音既同歡
於萬室罔惜費於千金厥篚織文出於襄邑池濯錦以

為名蜀有江而焉及復有咸平大縣我宋新建因紀年
以命號詔將作而營繕公宇之制甲於畿甸中有大川
通闌帶闌貫都邑而北來走江湖而南會何客棹之常
喧聚茶商而斯在千舸朝空萬車夕載西出玉關北越
紫塞徵尉氏之名本大夫之邑蓋鄭國之上田俾嶽宮
而世襲何彼樂郊今為畿地爰有仁木應乎嘉瑞二棠
合生雙榆連理槐獨秀而通枝木異類而同氣良宰畫
圖而來聞大尹飛章而奏異莫不名虎殿之宿儒集麟

閣之名士驗彼祥經考乎信史表六合之一家而帝德
之光被也加以地多數澤利有蒲魚晴澗望晶陂之色
山水觀惠民之渠乃有檝師炭商交易往復素衣化緇
漆身同色行舟則夏瞻雲雨售貨則冬禱雪霜經宋樓
而關征既薄歷朱曲而市稅有常潺潺洎溝渙渙有水
入鄢陵而碧截原田過扶亭而清耿閭里珍貨奔馬欄
之道豪俠聚建雄之市彼東昏之舊城易美號於新室
似興廢之有時而圖識之預出何以明而代昏符作畿

於聖日考城之人舊俗剛毅鄉出勇夫里多壯士椎埋
為姦任俠尚氣睚眦必報杯間刃起今為畿民禮東化
被暴虎之徒聞義則畏南阻太康淮陽甚邇地宜琅玕
家有蒼翠城過兩扶溝踰二備地既成於上田人不趨
於末利桑成陰而春繁棗結實而秋美問中年之耆民
歎魯恭之仁宰何三異之善政有千年之遺愛遇我后
之盛明西朝拜於園陵瞻路隅之靈廟想前史之嘉名
祭以上公之禮爵以太師之榮若夫八澤九溝二池三

固周流原野表界境內宿萬勝以遥觀見斗門之雙注
吸驚浪以橫來絕長堤而可懼其始也患彼決溢利其
填闕溉萬頃之陂澤變終古之烏鹵盡若膏腴咸通耒
耜有若決漳灌鄴旁之田鑿涇沃關內之土然後疏導
入白溝之流會同為漕渠之助彼梁固之在東亦派分
於波勢沿流有一舍之遥則水無寸差之異何一啓而
一閉常若合於符契始注陂而雷聲終入渠而駟逝散
濁浪以澄沙廣良田而濟世指陽武以北遇涉博浪之

長沙岡斷續以千疊塵飛揚而四遮人迷途而莫辨鳥
投樹以何賒策不進兮我馬輪欲埋兮何車過戶牖之
名鄉乃曲逆之舊里何分社之稱平已宰國而有志經
計相之里中思張蒼之善算屈柱史以事秦榮列侯而
佐漢宜二賢之靈祠歷千古而輝煥西望河流經帶二
邑高岸山立回灣箭急蟻壤夏漏衝決莫救基根相扶
萬柳千榆輿梢畚土常設備禦建營置卒轉粟實庾堅
彼金隄鑒乎前古秋防夏扞守以朝暮冬計春修役均

編戶岸艤連航兵屯兩渡阻浩浩之波坻憧憧之路北
權謳晨南帆落暮惟姦是防非利是務右倚太行橫絕
雲霧夫雍阻二嶠之險洛憑九河之固方之於是彼若
平路過濮水之長渠經封國之舊域寥落兮桐牢之亭
湮沒兮黃池之迹何昔也明誓重重諸侯於此以會同
今也京邑翼翼四方於此以取則涉長垣之塗歷古衛
之境城有婦姑之名人恭孝慈之行嘉孔子之入蒲先
宰予以觀政美大家之東征復農田而發運若乃南瞻

潘里北指蘭岡樹新文於二碑易美號於兩鄉因東封
之行幸感瑞應之非常忽有鶴唳降於穹蒼丹頂未辨
於煙際玉羽已穿於仗旁九其數象君道之體陽再而
降符帝運之重光何德動於上天而道盛於前王也如
是哉客既聞臣之說而知漢以宮室壯麗威四夷宋以
畿甸風化正萬國彼尚侈而務奢此歌道而詠德乃曰
使孟堅可作平子再生讀予之賦不敢復談於漢京也

御定歷代賦彙卷三十四


謹案卷三十三第十頁前五行支馭東方仍俾二
官按唐文粹支馭作友叙仍作乃此從文苑英
華

第十頁後六行閭閻之近革按唐文粹近革作舊
識此從文苑英華

卷三十四第七頁前四行察璿璣玉衡之制刊本
脫察字今增

第十頁後七行乃奏函鐘刊本鐘訛中據周禮改

金史四庫全書
第二十三頁前八行鬱正殿之崐嶺刊本嶺訛藥
據文選改



總校官庶吉士臣張能照
校對官編修臣楊壽楠
謄錄監生臣高瑞相
謄錄監生臣莫漢